



David Brodbeck (a schnestra) vain rimplazzà da Stefan Imhof (fotografia: mad).

Bergschule Avrona

Ün nouv manader per la scoula d'Avrona

Artikel in der Engadiner Post vom 30.09.2022

Cun Stefan Imhof ha la Bergschule Avrona chattà ün nouv manader da la scoula. David Brodbeck chi ha manà la scoula dûrant 15 ons ha bandunà quella sùlla fin da l'on da scoula 2021/2022.

La Bergschule Avrona vain manada al mumaint da trais persunas chi surpiglian minchüna üna part da la responsabilità. Maya Gasser es responsabla per la chüra ed es cumpetenta sco manadra da l'instituziun. Sibylle Ovenstone s'occupa dal personal, da las finanzas e surpiglia üna part sco manadra da l'instituziun. David Brodbeck es stat amo fin la fin da l'on da scoula 2021/2022 manader da la scoula. «La squadra chi exista da trais persunas chi partan la responsabilità s'ha verifichada e funcziuna bain», disch Maya Gasser i'l rapport annual da la scoula.

Cun quai cha David Brodbeck ha desdit sia piazza per la fin da l'on scolastic 2021/2022 ha surtut Stefan Imhof quella lezcha. Quel lavura fingià daspö divers ons ad Avrona e cugnuoscha fich bain la situaziun da la scoula. Illa charta da Sandra Eicher, presidenta dal cussagl da fundaziun as poja leger: «David Brodbeck ha manà la scoula dûrant 15 ons cun cour e cun grond ingaschamaint e per el vaiva il bainesser da scolaras e scolars prüma priorità. Cun seis esser e cun sia posiziun sco persuna da respet d'eira el tant pro'ls scolars ma eir pro'ls collavuratuors fich bainvis.»

Cun l'agüd da collavuraturas e collavuratuors ha gnu lö ün müdamaint, ideals ed ideas pedagogicas han pudü gnir realisadas ed hoz es Avrona üna scoula interchuantala speziala chi funcziuna bain. Dal 2021 vaiva la scoula constant 24 scolaras e scolars.

Sül livel strategic haja eir dat müdamaints illa scoula d'Avrona: «Nus vain gnu i'l cussagl da fundaziun ün müdamaint in möd cha Tom Rumpe chi s'ha ingaschà divers ons per l'instituziun s'ha retrat. Per el vain nus chattà üna successiun cun Markus Solinger e til bivgnantain cordialmaing», uschè Sandra Eicher.

La Bergschule Avrona as rechatta a l'ost da Tarasp illa fracziun Avrona ed es üna scoula chi vain manada tenor metodas antroposoficas da Rudolf Steiner. Là chattan uffants e giuenils cun bsögns particulars e cun disturbis da cumport daspö divers ons ün lö da scolaziun chi piglia resguard sün mincha singul. I's tratta d'ün internat chi spordscha sper la scolaziun eir structuras d'abitar. La scoula spordscha ün ambiaint chi'd es lontan dals centers, in üna cuntrada chi sustegna la scolaziun individuala.

Text: Benedict Stecher/fmr